

道光遵義府志

遵義府志卷八

壇廟 寺觀附

古者封內之祭禮詳八蜡傳著四鄰凡所以爲民也  
國家至治馨香百神受職崇德報功禮從優厚今冀郡  
中正祀使成民致力者思何以格於神明福茲黎庶  
至於里巷供奉所在多多誠有如唐志所云蜀俗好  
事鬼神尤多忌諱者然民誠所寄難概芟削略擇著  
者附其後焉亦使斯民知敬神而遠其道固不在彼  
也

遵義府

社稷壇

通義縣附  
府合祭

在城外南萬曆四十年春知縣

王之楨重修志在府城西門外通按今在西門內府

署後山上

大清會典直省府州縣各擇爽塏之地建社稷壇均北向

歲以春秋仲月上戊日為民祈報會城明總督若巡

撫主之道官分治各府者於所治主其祭其餘府州

縣皆正官將事以各學教官糾儀生員充禮生會城

以丞倅府州縣以椽史執事祭日鷄初鳴丞祭官以

下咸朝服齋集黎明贊引禮生二人引丞祭官詣盥

洗所盥洗通贊禮生贊執事者各司其事

以下自選  
神至望

皆唱贊引禮生贊就位引承祭官階前拜位立引班

禮生二人分引陪祭官文東武西班與外省朝賀同各就拜

位序立迺迎神贊引贊升壇引承祭官升壇詣香案

前司香跪奉香贊引贊上香承祭官三上香贊復位

引承祭官降復位贊跪叩興以下行禮皆有贊承祭官行三

跪九叩禮陪祭官皆隨行禮奠帛初獻爵司帛奉篚

進跪奠篚司爵奉爵進獻爵奠正中皆退司祝禮生

至祝案前跪承祭官暨陪祭各官皆跪司祝讀祝畢

詣神位前跪安於案叩如初退承祭官暨陪祭各官

行三叩禮亞獻爵奠於左終獻爵奠於右均儀如初

獻迺徹饌送神承祭官行三跪九叩禮陪祭各官皆  
隨行禮司祝奉祝司帛奉帛恭送瘞所承祭官轉正  
拜位西旁東面候祝帛過復位引至望瘞位望瘞贊  
引告禮成引退眾皆退

雍正十年

頒行社稷壇祀典築城之南郊座向北方地廣袤二畝有  
奇壇方二丈五尺高二尺四寸出陛各三級壇前九  
丈五尺東西南各五尺周繞以墻石主長二尺五寸  
方一尺埋於壇上正中近南二尺五寸露圓尖於外  
神牌以木爲之高二尺二寸闊四寸五分座高四寸

五分闊八寸五分朱漆青字祭畢藏之牌一書酬社之神居東一書酬稷之神居西每歲仲穡上戊日致祭陳設爵三篚二帛黃色各長一丈八尺俎二羊豕簠二黍稷簋二稻粱鉶二和羹籩四形鹽橐魚棗栗豆四韭菹醢醢菁菹鹿醢香燭儀注與文廟同無以表封圻育三農而蕃稼稽恭承守土肅展明禋時屆仲穡敬修祀典庶芃芃松柏鞏磐石於無疆翼翼黍苗佐倉箱於不匱尚饗

神祇壇

遵義縣附府台祭

在城外東萬曆四十年春知縣

王之楨重修志在府城西門外通志按今在鳳朝關東

東壇坳

大清會典直省府州縣各建神祇壇中設雲雨風雷之位  
左設本境山川之位右設本境城隍之位歲以春秋  
仲月諏日致祭孟夏諏日行常雩禮如常雩後不雨  
自督撫至州縣咸率所屬致齋修省虔禱神祇為民  
請命既應而報陳設禮儀均與春秋常祭同若久雨  
祈晴冬旱祈雪禮亦如之

雍正十一年

頒行神祇壇祀典築城之北郊座向南方地壇制度與社

稷同無石神牌一書風雲雷雨之神居中一書黼境

內山川之神居左一書黼城隍之神居右每歲仲春

仲秋上戊日致祭陳設與社稷同白儀注與社

稷同無瘞祝文曰維神贊襄天澤福祐羣黎佐靈化

以流行生成永賴乘氣機而鼓盪温肅攸宜磅礴高

深永保安貞之吉憑依鞏固實資捍禦之功幸民俗

之殷盈仰神明之庇護恭修歲祀正直良辰敬潔豆

籩祇陳牲幣尚饗

先農壇遵義縣附在府城東門外

國朝雍正五年奉

通志

建通志藉田在東隅里二甲雍正五年知縣顧捐置每

歲收租銀二兩二錢除糧銀二錢一分三釐六豪以

為盞盛之用現在藉田收穀八石二斗不敷銀赴司

領按今在白田垵總會廟側

大清會典凡饗先農之禮奉天府尹直省督撫率所屬府

州縣均歲以仲春吉亥行耕藉禮各于治所東郊建

先農壇朝服行禮用帛一羊一豕一鉶二簠簋各二

邊豆各四尊一爵三餘儀與直省祭社稷壇同禮成

更采服率屬行耕藉禮

直省耕藉之禮奉天府及直省府州縣於東郊先農

壇側擇地爲墾田歲仲春吉亥既有事於先農廼行耕藉禮省會營撫秉耒府佐貳一人奉青箱一人播種司道秉耒縣佐貳奉青箱播種府縣秉耒首領雜職官奉青箱播種各府州縣如之專城衛所正印官秉耒掾史奉青箱播種采服每歲收穫以供祭祀之粢盛督撫以奉行耕藉日期具疏以

聞

雍正四年

頒行先農壇祀典藉田四畝九分壇高四尺一寸寬二丈五尺壇後建正房三間配房各一間正房中間供奉

神牌東間存貯祭器農具西間收貯藉田米穀配房  
東間置辦祭品西間令看守農民居住壇廟藉田之  
外周圍築土爲牆門南向神牌與社稷同紅牌金字  
填寫先農之神農具赤色牛黑色耕種箱青色所用  
耕種悉照各處土宜每年仲春月候禮部頒吉期舉  
行陳設儀注與社稷同各官穿朝服行禮換蟒袍補  
服耕藉正印官秉耒佐貳執青箱播種用耆老一人  
牽牛農夫二人扶犁九推九返農夫終畝耕畢各官  
率耆老農夫望

闕行三跪九叩禮祝文曰維神肇興稼穡粒我蒸民頌思

文之德克配彼天念率育之功際常時夏茲當東作  
咸服先疇洪惟九五之尊歲舉三推之典恭膺守土  
敢忘勞民謹奉彝章聿修祀事惟願五風十雨嘉祥  
常沐於神庥庶幾九穗雙岐上瑞頻書乎大有尙饗  
乾隆七年

頒行雩祭禮每歲孟夏行常雩禮不另立雩壇卽於先農

壇行禮並合配社稷山川諸神牌位祝文乾隆九年頒曰

恭膺

詔命撫育羣黎仰體

彤廷保赤之誠勤農勸稼俯惟芻屋資生之本力穡服

田令甲爰頒聿舉祈年之典惟寅將事用申守土之忱黍稷惟馨尙冀昭明之受賜來牟率育庶俾豐裕於蓋藏尙饗

乾隆七年

頒行崇祭禮歲祭雩祈雨潦則崇祭城門祈晴祝文曰恭膺

詔命臨民職司守土惟兆人之攸賴並藉神功冀四序之常調羣蒙福蔭必使雨暘應候爰占物阜而民安庶其寒燠咸宜共慶時和而歲稔仰靈樞之默運聿集嘉祥襄元化以流行俾無災害尙饗

厲壇遵義縣附府合祭

在城外北陳按今在北門外昭忠

祠後

年

頒行厲壇祀典每歲春清明日秋七月望冬十月朔致祭  
先期三日主祭官齋戒補服備香燭酒果詣城隍廟  
就位一跪三叩詣神位獻爵讀告文復位一跪三叩  
禮畢陳設城隍牌位設于壇上祭物用一羊一豕饌  
與社稷同無帛無祀鬼神牌位設於壇下左右相向  
祭物用一羊一豕解作殽置於磁盤酒三湯三飲五  
肉五儀注承祭官就位一跪三叩詣城隍牌位前跪

獻三爵興復位一跪三叩禮畢告城隍文曰某縣遵承禮部劄付爲祭祀本縣無祀鬼神該欽奉

皇帝聖旨普天之下后土之上無不有人無不有鬼神人鬼之道幽明雖殊其理則一今

國家治民事神已有定制尙念冥冥之中無祀鬼神昔爲生民未知何故而沒其間有遭兵刃而死者有死於水火賊盜者有被人取財而逼死者有被人強奪妻妾而死者有遭刑禍而負屈死者有天災流行而瘟疫死者有爲猛獸毒蛇所害者有爲饑餓凍死者有因戰鬥而殞身者有因危急而自縊者有因牆屋

傾墮而壓死者有死後無子孫者此等鬼魂或終於前代或沒于近世或兵戈擾攘流移于他鄉或人烟斷絕久缺其祭祀姓氏泯沒于一時祀典亡闕而不載此等孤魂死無所依精魄未散結爲陰靈或倚草附木或作爲妖怪悲號于星月之下呻吟于風雨之時凡遇人間節令心思陽世魂杳杳以無歸身墮沉淪意懸懸而望祭興言及此憐其慘淒故勅天下有司依時享祭命本處城隍以主此祭鎮控壇場鑒察諸神等類其中果有生爲良善誤遭刑禍死于無辜者神當達于所司使之還生中國永享太平之福如

有素爲兇頑身免刑憲雖獲善終亦出僥倖神當達於所司屏之四外善惡之報神必無私欽奉如此今某等不敢有違謹于某年某月某日于城北設壇置備牲酒湯飲享祭本縣無祀鬼神等衆然幽明異境人力難爲必須神力庶得感通今特移文於神先期分遣諸將召集本縣闔境鬼靈等衆至日悉赴壇所普享一祭神當欽承

勅命鎮控壇場鑒察善惡無私昭報爲此合行牒移請照驗欽依施行祭無祀鬼神文曰維年月日具官某等遵承禮部劄付爲祭祀本縣闔境無祀鬼神等衆事

該欽奉

皇帝聖旨普天之下后土之上無不有人無不有鬼神人鬼之道幽明雖殊其理則一故天下之廣兆民之眾必立君以主之君總其大又設官分職於府州縣以各長之名府州縣又于每百戶內設一里長綱領之上下之職綱紀不紊此治人之法如此

天子祭

天地神祇及天下山川王國各府州縣祭境內川山及祀典神祇庶民祭其祖先及里社土穀之神上下之禮各有等第此事神之道如此尙念冥冥之中無祀鬼神

昔爲生民未知何故而沒其間有遭兵刃而橫傷者  
有死于水火盜賊者有被人取財而逼死者有被人  
強奪妻女而死者有遭刑禍而負屈死者有天災流  
行而瘟疫死者有爲猛獸毒蛇所害者有饑餓而凍  
死者有因戰鬥而殞身者有因危急而自縊者有因  
牆屋傾墮而壓死者有死後無子孫者此等孤魂或  
終于前代或沒于近世或兵戈擾攘流移于他鄉或  
人煙斷絕久缺其祭祀姓名泯沒于一時祀典亡闕  
而不載此等孤魂死無所依精魄未散結爲陰靈或  
倚草附木或作爲妖怪悲號于星月之下呻吟于風

雨之時凡遇人間節令心思陽世魂杳杳以無歸身  
墮沉淪意懸懸而望祭興言及此憐其慘悽故勅天  
下有司依時享祭在京都有泰厲之祭在王國有國  
厲之祭在各府各州有郡厲之祭在各縣有邑厲之  
祭在一里又各有鄉厲之祭期于神依人而血食人  
敬神而知禮仍命本處城隍以主此祭欽奉如此今  
某等不敢有違謹設壇于城北以三月清明日七月十五日  
初十日置備牲醴羹飯專祭本縣合境無祀鬼神等  
眾靈其不昧永享此祭凡我一縣境內人民倘有忤  
逆不孝不敬六親有姦盜詐僞不公法者拗曲詐直

欺壓善良者有躲避差徭靠損貧戶者似此頑惡姦  
雄不良之徒神必報于城隍發露其事使遭官府輕  
則笞決杖斷不得號爲良民重則流徙絞斬不得生  
還鄉里若事未發露必遭陰譴使舉家並染瘟疫六  
畜田蠶不利如有孝順父母和睦親族畏懼官府遵  
守禮法不作非爲善良正直之人神必達於城隍陰  
加護佑使其家道安和農事順遂父母妻子保守鄉  
里我等合州官吏如有上欺

朝廷下罔良善貪財作弊竈政害民者靈必無私一體  
昭報如此則鬼神有監察之明官府非諛諂之祭尙

饗

關帝廟 有三祀漢壽亭侯關公一在城東街萬歷三十九年遵義道李芳重修一在城外北五里一在樓山關四十九年二月知府孫敏政行遵桐二縣重修五月十三日郡人祀之孫志

國朝順治元年

詔諭忠義神武關聖大帝後加靈佑二字雍正三年

詔追封三代曾祖光昭公祖裕昌公父成忠公乾隆二十五

年

詔改諡神勇三十三年

詔諡忠義神勇顯佑嘉慶十九年

詔於忠義神武靈佑六字外敬加仁勇二字廟今在城東門

丙小十字街

大清會典凡祀關帝之禮歲以春秋仲月諏吉官祭關帝於地安門外之西關帝廟仲夏中旬三日歲遣官致祭前殿後殿直省府州縣春秋二仲及仲夏中旬三日均祀關帝牲帛禮儀均與祭京師關帝儀同

雍正五年

頒行武廟祀典每歲仲春仲秋陳設帛一爵三牛羊豕核桃荔枝龍眼棗栗儀注祭日贊引生引承祭官進左

旁門至盥洗處贊引贊盥洗盥洗畢引至殿內行禮  
處站立典儀生唱執事者各司其事贊引生贊就位  
引承祭官就位站立典儀生唱迎神司香生捧香盒  
就香爐左邊立贊引生引承祭官就香爐前立贊引  
生贊上香司香生跪捧香承祭官立將柱香接舉插  
爐內又將塊香上三次畢贊引生贊復位引承祭官  
復原位站立贊引生贊跪叩興承祭官行三跪九叩  
禮典儀生唱奠帛獻爵行初獻禮捧帛爵生將帛爵  
捧舉各就神位前贊引生贊奠帛捧帛生跪獻畢行  
三叩禮退獻爵執爵生立獻畢退讀祝生至安祝文

棹前行一跪三叩禮將祝文捧起立贊引生贊跪承  
祭官跪讀祝讀祝生跪讀祝畢捧至神位前跪安盛  
帛盒內畢行三叩禮退贊引生贊叩興承祭官行三  
叩禮立典儀生唱行亞獻禮執爵生照初獻禮獻畢  
退典儀生唱行終獻禮執爵生自案右邊照亞獻禮  
獻畢退典儀生唱徹饌送神贊引生贊叩興承祭官  
行三跪九叩禮立典儀生唱捧祝帛各恭詣燎位捧  
祝帛生各至神位前行三叩禮將祝帛捧起依序捧  
送時贊引生引承祭官退至西邊立候捧祝帛各生  
過畢復位站立贊引生贊詣望燎位引承祭官至燎

爐前焚祝帛贊引生贊禮畢引承祭官退祝文曰維  
年月日具官某致祭於忠義神勇顯佑關聖大帝曰  
惟帝浩氣凌霄丹心貫日扶正統而彰信義威震九  
州完大節以篤忠貞名高三國神明如在徧祠宇于  
寰區靈應丕昭薦馨香於歷代屢徵異蹟顯佑羣生  
恭值嘉辰遵行祀典筵陳籩豆式奠牲醪尙饗後殿  
陳設與關帝同無牛羊儀注與關帝同承祭官進中  
門復位送神二節行二跪六叩禮祝文曰維公世澤  
詒庥靈源積慶德能昌後篤生神武之英善則歸親  
宜厚尊崇之報列上公之封爵

錫命攸隆合三世以肇禮典章明備恭逢諏吉祇事薦馨

尚饗

文昌廟 在宣慰司治東鳳山上宋建後重修明統志

在城東門外一里知府孫敏政重修懋歲以二月初

三日為帝降誕士民家祀之陳志在府治中通志按今在

府學宮左

嘉慶七年

頒行文昌宮祀典前殿牌面寫文昌帝君神位後殿牌面

寫文昌帝君先代神位每歲春以二月初三日聖誕

為祭期秋以欽天監選定吉日為祭期陳設與武廟

同儀注與武廟同祝文曰維神蹟著西垣樞環北極  
六匡麗曜協昌運之光華累代著靈爲人文之主宰  
扶正久彰夫感召薦馨宜致其尊崇茲屆仲秋用昭  
時祀尙其歆享鑒此精虔後殿陳設儀注與武廟後  
殿同祝文曰祭引先河之義禮崇反本之思矧夫世  
德彌光延賞斯及祥鍾累代炯列宿之精靈化被千  
秋緯人文之主宰是遵後殿用荅前庥茲值仲秋肅  
將時祀用伸告潔神其格歆

呂祖廟 在城東門外嘉慶十一年

勅封燮元贊運警化孚佑真君春秋崇祀

城隍廟 舊在丁字口明萬曆間改建于治北知府  
係敏政重修廟有堂廡正殿左右廊廊列各屬城隍  
木廟土地門甬壯麗遵依洪武二十六年著令合祭  
神號曰府城隍之神歲以春秋二仲附祭于山川壇  
風雲雷雨山川居左城隍居右每厲祭則主之宣德  
八年定制新官到任以羊豕各一祀于城隍廟又凡  
旱潦祈報必虔告之蘇陳在府城內趙按廟在祝釐  
寺右康熙三十九年府通判楊彩補修有碑記

忠義孝弟祠 在府城南門外通志

大清會典凡祭昭忠祠之禮直省府州縣各立忠義孝弟

祠祠內設本鄉忠臣義士孝子悌弟各牌位所在有  
司歲以春秋致祭用帛一羊一豕一爵三尊一承祭  
官行禮儀與祭省會賢良祠同

節孝祠

在府城東

通志

昭忠祠

初在桃源洞右外道光二十年知縣楊書

魁移建北門外

新纂

大清會典凡祭三等零祀社稷爲大祀先師孔子先農先

蠶天神地祇太歲爲中祀先醫等賢良昭忠等祀爲

羣祀

凡祀期

春秋二仲祈報社稷以戊釋奠於先師以丁仲春饗先農以亥遇天寒用季春昭忠祠及羣祀皆小吉祭日均質

明行事

凡牲四等社稷太牢配位同神祇均太牢先師先農之祀如之配位少牢羣祀如之牛色尚黝大祀入滌九旬中祀三旬羣祀一旬

凡樂四等七奏以祭社稷饗先農如之六奏以饗先師祀神祇如之

凡祝版祭社稷白質墨書太歲以下均白質墨書

凡祭器社稷玉爵配位用陶先農陶爵豆登簋盞鉶

尊同

凡齋戒大祀三日中祀二日

頒勅羣臣誓戒百執事恭書於版王公陳設於府第文武  
官陳設於公署王公百官均於私第致齋齋戒之日  
不理刑名不燕會不聽樂不入內寢不問疾弔喪不  
飲酒茹葷不祭神不掃墓有疾有服者皆弗與

凡直省壇廟各督撫飭守土官察其境內之應修者  
計費申報咨部動項葺治工竣請銷其祭器未備以  
及歲久殘闕者亦飭有司按數修造以供祀事嶽鎮  
海瀆神廟及先聖先賢名臣忠烈祠宇有傾圮應修

者地方有司動本省公項葺治報部覈銷

遵義縣

城隍廟 在城內三洞橋大有倉右嘉慶

重修

崇德廟 在宣慰司治南二里祀蜀郡守李冰明統志

郡人以六月二十四日神誕祀之縣志

蠶神廟 在城外鳳朝關側中祀先蠶旁即陳公祠

祀知府陳玉璧郡人月日九月十五日祈報

禹王廟 在城東門外鳳朝關側

普澤廟 在宣慰司治南二里祀合瀘刺史趙延之

明統按神唐大厯中領巴州令兼鎮南軍馬使以平  
資瀘夷亂授合瀘刺史按部終于壁山邑人祀之水  
旱禱輒應封威烈侯宋慶厯間賜號普澤累封英顯  
廣利公洪武初載在祀典歲以七月十二日因神降  
誕有司具牲醴致祭志按宋朱炎合州普澤廟記引  
圖經云延之大厯中任巴川縣令兼南鎮軍兵馬使  
時資瀘夷賊寇掠縣境延之領兵襲之以功授合州  
刺史兼渝合資瀘等州經略巡撫使常巡厯至渝州  
壁山寨見石壁上隱隱若有人形因以香酒奠之後  
疾終於此邑人爲之立廟禱有靈應咸通二年夷賊

攻逼州城告神為援賊眾奔敗人見甲兵洶湧爭往

馳逐蓋神陰助也聞奏封威烈侯

忠烈廟 祀武翼大夫楊燦宋度宗賜額忠烈明統志

忠顯廟 祀武功大夫楊玠宋度宗賜額忠顯明統志

以上二廟俱載通志今廢孫志

穆家廟 在丁字口川主行祠闔郡嚴祀孫志

高崖祖廟 在城外通志二十里舊川志用祀川主

行神郡人更祇祀之孫志一云二郎廟祀蜀郡守李冰

歲以六月二十四日郡人家祀之陳志按廟在城東十

里山嶰嶰特峙雄壓諸峰相距二里許名虎頭峰乃

故所稱高巖後移以稱此山廟爲唐貞觀八年創建  
祀蜀太守李冰及子二郎乾符中補修自後修葺無  
攷明萬曆四十六年戊午遵義知縣劉人表崇禎四  
年辛未四川按察使盧安世

國朝康熙三十二年癸酉總兵王國忠五十一年壬辰  
總兵魏相知府王元弼並重修有記乾隆三年戊午  
知府蘇霖泓復整祀田重加增拓迄今遞有修補遵  
義五屬川主廟無三里茂有惟高巖山獨古歷代以  
來多著靈應崇禎壬午癸未間獻賊欲屠遵義神顯  
靈退賊郡以獲全事載王國忠記甚詳

按國忠記今漫漶不可識

此據心齋隨筆言復不詳問者老言張獻忠遣李鶴  
 子來密遵義道經高巖則見陰雲蔽空蜀守持三尖  
 刀指賊曰若傷吾一百姓爾身俱斷賊胆落遂反走  
 此雖未定本國忠所記要必有此事非臆造之說  
 知人心悚敬盡肅向此山而蜀守為民捍禦之精神  
 亦即蒸蒿悽愴於其上也宜其異也

附陳盟撰修廟記輔世而剪兇害幽而奠境

又民是其生為名臣為卓宦而聲華炳烺於當代  
 也則宜其沒為上真為明神廟貌祠之血食奉之  
 而精爽昭於異世也則尤宜昔在漢初有李公為  
 吾蜀益州守冰其諱也德政並懋當時小神作崇  
 川波泛壅大貽民害公奮然殪之於在俾厥安流

其事甚奇功甚著灌溉之利迄今千數百年蜀民  
猶食其澤而公之英靈亦遠與厥功不磨迄今千  
數百年蜀民所以崇奉尸祝之者閱唐宋至我皇  
明猶凜凜如一日是以三川形勝之地往往建宇  
以像公而夜郎之東距城二十里高峰岬俯臨  
萬山臺閣巋然呼吸六虛有公祠在焉凡夜郎之  
民歲時蒸嘗者趾相錯於途則以公之靈爽較他  
處尤著而廕庇斯土者非伊朝夕之故也曩自公  
麼弄兵遵城千里烽燧縱橫一時琳宮梵刹鮮不  
罹于燹而斯祠獨存其殆公之明威有以攝蛇豕

之克焯而悸其膽乎於時監督憲副環水盧公蜀  
鎮朝石侯公遵鎮春字劉公協鎮信吾陳公勦蘭  
撫黔首復遵城掃天狼而集鴻雁歌狸首而草鴉  
音廢墜俱舉百度維新幸公祠之獲存而傾圮未  
葺於遵民安佑之意既弗愜且規制湫隘于國家  
崇報之典又弗光乃相與捐俸而改初之堂寢庶  
室皆倍於舊且買田若干畝供四時焚獻之需用  
以順民志而答神庥也落成之日予適因展壠賜  
假旋里盧公移書俾予記之予於是有感焉夫有  
嚴有赫好是正直神何求於世而世自求之豈非

功德在人不可忘耶然則內而卿相師保外而岳  
牧連帥遵庇民豐功茂績各循其職而不求  
人知然而人自稱誦於身前且思慕於身後者又  
何以異於神耶嗟乎鼎衝鈞軸大燾高牙世豈乏  
貴顯哉廼生而碌碌沒而泐泐其於世道無分毫  
補以此事神神其吐之今四君勘定之勛偉於茲  
土輯懷之澤洽於群心詩云愷悌君子神所勞矣  
則神之保釐凋敝與四君之膏沐瘡痍其餘休均  
未有艾吾知其並垂不朽矣是爲記蘇霖泓重修  
廟記傳曰能禦大災則祀之能捍大患則祀之祀

神之典亦綦重矣考蜀志高巖山川主之神爲隋  
嘉州太守多惠政能入江斬蛟以除水患唐封神  
勇大將軍又封赤城王立廟灌口宋張詠治蜀因  
亂禱祠乃得神助事平以聞封川主清源妙道真  
君神之福利斯民彰彰如是又聞諸父老明末流  
賊屠戮兩川幾無噍類賴川主之神於桐梓縣婁  
山關特顯靈異以遏其鋒故賊不敢入遵郡獨全  
至今士民祀之甚謹予自軍前給假回郡辦理平  
糴時至初夏久旱無雨亢陽爲厲農事未舉憂心  
如熾謀及士庶僉云禱高巖山可得雨必竭誠乃

應於是齋心滌志率僚屬步禱於山焚牒以告爲  
斯民陳疾苦甚切是夕陰雲密布雷始發聲大雨  
如注竟夜乃止次日河水橫流四野沾足農耕於  
田工歌於市米價遂平民心俱悅荷神之庥理當  
報祀於是束帛牽牲製額以謝近山紳士耆民咸  
集廟內予見棟宇傾頽樹木零落詢之士庶供出  
廟祝李常清跋扈此山佔踞祀田竟爲已業砍伐  
樹木賣以罔利並不焚獻因至廢弛乃飭縣尉公  
同地鄰於常清名下察出祀田三處糧銀界至踏  
分楚楚更簽司祝敬謹焚修以其事申諸方伯勒

石以垂不朽夫神無常享享於克誠民之秉彝好是懿德自甘霖沛而農事舉廟田清而祀典具輿情允洽民氣以和祈報者踵相接也修廢之心油然而起予因捐俸爲之首倡樂輸者從便乃拓其階墀使之爽塏加以丹雘重其觀瞻匪惟崇德報功以示儆末俗俾知巍巍者山明神在上鑒我愚誠介爾景福凡厥庶民殷勤於作善降祥之理孝友姻睦敦行不倦出入息含哺鼓歌庶幾災沴全消雨暘時若熙熙皞皞優遊太平之世是則神之賜也亦卽予之志也

李忠宣廟 祀元安西行省左丞贈尙書右丞諡忠  
宣李德輝元史傳云至元十七年德輝被命在播卒  
蠻夷聞訃哭之哀如私親爲位而祭者動輒千百人  
播州安撫使此間當有僉事二字何彥清率其民立廟祀之善  
政詳宦績廟今無存

五公祠 前明在桃源洞口建三公祠祀平播功臣

李化龍王象乾崔應麒孫志後廢康熙五十五年通判

胡期恆重建祀李化龍劉縝名二公祠並設神位知

府于方柱始自他祠移劉縝像祀此通志乾隆四十四

年知府張景宗增祀崔應麒王象乾郭子章而移縝

原像於旁楹是爲五公祠

附張景宗復建桃源祠記播川唐乾符時爲南詔所陷楊端應募復之遂世有其地傳至有明楊應龍以叛誅方建郡邑其時長垣李公化龍總制川湖貴州督八路總兵官百有十四日而應龍滅首功則推都督劉公綖而善後其事者在蜀則總督王公象乾在黔則巡撫郭公子章其詳載之史策景宗於乾隆戊戌秋以平越守移署遵義均播境也案牘餘閒時懷往事見郡東郭間山半石壁劃通劈開勝致山影如屏波光似鏡憑軒遠眺頗豁

心目未知所昉而亦托名於武陵之仙源洞中祠  
宇三楹僅有一像歸然獨在則所謂劉將軍者也  
余甚詫焉平播之役師武臣力省吾洵爲露布冠  
而李于田經緯雄才機權猷出將得其用士盡其  
能郭相奎單騎入黔尅期奏凱十年畱鎮善後攸  
宜王霽宇繕城郭立學校簡任賢俊撫綏流離均  
未可泯也因閱省志則桃源洞舊有銅標紀平播  
功洞口有三公祠祀平播總督李公化龍王公象  
乾按察崔公應麒前明所建久之並廢

國朝康熙五十五年通守胡公期恆重建二公祠唯李

襄毅與劉少保並祀焉至祠中原像則又因二公  
祠久廢前太守于公方柱特於他祠移祀耳夫播  
平迄今未二百年而缺略若此薦紳人士類能歿  
之史冊而樂壤羣黎不復知李郭爲何人將並不  
知劉將軍爲何人也爰卽古祠仍設三公之位而  
郭公恩著黔省是郡現隸於黔故並崇祀劉公原  
像則移之旁楹存其舊也楹前敬刊奉

勅纂修明史節錄李少保傳贊揭之於石匪直紀功彰善禮  
惟宜之而游盼之餘時焉瞻仰將念復嶺重江鬱  
茲雄郡妖氛陣雲消爲和風甘雨流離墊隘因以

豐卓蕃昌知當年廓清之烈綏撫之宜良非易易  
緬維嚮往亦得所傳信以不忘其所自始茲境不  
第作勝游觀也乾隆四十四年

白石口五公祠 在城北八十里大樓山白石口今  
移入附近之黑神廟

東門樓劉將軍祠 乾隆二年知府蘇霖泓奉祀劉  
挺像於城東門樓上十一年知府朱東啟撥廢寺田  
產歸僧焚獻後廢據張景宗五公祠記言劉少保原  
像爲前守于方柱自他祠移祀以方柱任守時推之  
可知此祠廢後其像蓋移之二公祠事在乾隆四十

年前後也

附蘇霖泓撰祠記明都督劉將軍者豫章人也由  
南昌衛指揮以戰功晉秩總戎萬厯初播酋楊應  
龍叛稱兵向蜀所至摧殘因集三省之師環攻並  
舉於時少馬長垣李公總督軍務黔則泰和郭青  
螺先生撫其軍劉公授節振旅由偏橋進取賊悉  
力守險以拒公奮勇先登所向披靡連破數十寨  
直渡烏江賊窘退據海龍壘負隅死守復以奇兵  
破其巢穴俘賊首獻事平晉階左都督自設官分  
職建學明倫以公崇祀名宦春秋配饗報有功也

攷播州自楚莊躋略地溯江而上至泮柯達夜郎  
皆已內附歷漢唐宋俱通聲教徵辟名賢載諸史  
乘及楊氏納土因世其官遂同羈縻播人之不覩  
天日蓋數百年雖巨酋不道自覆其宗然非雄武  
如公謀勇兼備戰勝攻取一旦削平禍亂烏能復  
版圖而敷王化俾士習民恬致有今日之盛者哉  
是公之大有造於播也夫伏波之柱尙足壓苗峴  
山之碑猶至墜淚公生平功烈於開播爲最偉其  
精神氣魄磅礴於鳳嶺虎溪間尸而祝之固其所  
也予乃因士民之意並江右客衆所請奉公像於

東城之上襟帶江河永鎮疆域俾農工商賈奠厥  
室家寧爾幹止以生以養優游而享太平之福詎  
非保世滋大無疆惟休者與乾隆二年丁巳朱東  
啟撥田焚獻記竊照遵邑東門城樓中舊塑有明  
時劉將軍諱縉神像當日原有僧人在內焚獻因  
無常住田產以致無人看守像貌傾圮本年二月  
內清查廢寺查得東七甲永福庵田條糧三錢九  
分七厘二毫南又六甲趙氏廟田條糧四錢零東  
又十甲虎頭廟田條糧三分平又七甲水口寺田  
條糧二錢五分以上五處寺廟久已寺廢僧逃所

遺常住田土向爲寺鄰佃戶等侵蝕伏思劉公當日保全遵義大有功於士民今欲崇隆偉績惟有將此等廢寺田產撥歸神廟以作焚獻之資業經詳明各憲批准先行招佃認租每年計可獲市斗穀石除登印冊永遠遵奉外恐日久淹沒復爲佃戶人等侵奪特勒碑記以誌不朽計開田畝界畔

一處南又六甲趙氏廟田條糧四錢二分田土

一幅 一處東又十甲虎頭廟條糧三分田土

一幅 一處平又七甲水口寺條糧二錢五分田土

一幅地名花水田上抵山腳下抵河坎左抵楊宅

田坎右抵楊宅田坎 又楊四田一分上抵寺林  
下抵河坎左抵楊宅土坎右抵楊宅田坎 又寺  
基山土一幅上抵山頂下抵姚宅坎乾隆十一年  
歲次丙寅

劉將軍祠 乾隆中東門樓祠廢綖像移祀桃源洞  
中張景宗記所謂洞中屋宇三楹一像歸然者也至  
十一年於洞上十步許創祠移像祀之道光二十  
年知縣楊書魁復建祠今所移祀祠右距洞口十步  
許

王公祠 在府城內祀明遵義知縣王佐聖死土賊

郭士奇之亂故祀之志按祠初建於大士閣左側後廢尚存原址今在三官樓側者康熙三十年佐聖季子省爲邵陽令詳請父入祀名宦三十二年別購地於三官樓側建祠置祀田一分附城隍廟爲每年焚獻勒石紀事三十七年城災祠石俱燬後別設牌位於縣城隍廟常公祠內五十九年於舊祠址重建道光十三年知縣張瀚中復增靖難鄉勇王尙明冉國柱王之琴牌位配食

宣峰崕王公祠 王選王之琴冉國柱皆永安里人應縣官王佐聖募爲鄉勇頭目崇禎十五年四月吳

上賢之寇各率家丁鄉兵禦于宣峰煙眾寡不敵皆  
 力戰死是年五月里人建祠于戰沒處以三人配食  
 佐聖請于叛黨絕業中給近田三十畝以供祭饗列  
 錄

蔡公祠 在府城大士閣右祀知府蔡毓華通志

常公祠 明末建在今縣城隍廟右側祀知府常三

錫邊郡紀事

三皇廟 在府治北陳志北通志作西

火神廟 一在城內一在城東門外

雷祖廟 在城東門外雷台山

天后廟 在城內大十字街

馬王廟 一在城南門內一在城內火神廟側

三官廟 在城東門外萬壽橋上

真武廟 在城東門內關帝廟右

三聖廟 在城北五里陳志

黑神廟 在城南獅子橋側祀唐南霽雲一在城西

八十里沙七甲見陳志

蕭公廟 在治東五里祀宋蕭日軒洪武初封英佑

侯者陳志

張桓侯廟 在城東門外桃源山

楊泗廟

在桃源山

萬壽宮

在鳳朝關側

東嶽廟

在城外知府孫敏政重修建一坊志嗣齡

閣附廟內有碑記歲以三月二十八日為帝降誕郡

人設醮崇祀之陳志

五顯廟

在城內正街按靈應集云神以五名即金

木水火土與天地相為木始又專司火政是以里社

皆崇奉每以九月二十八日誕晨醮祀之孫按今為

藥王廟在城內大十字街

總會廟

在東關外合祀諸廟神祇知府孫敏政助

修郡人歲時祀之孫志

正安州

社稷壇 在治東門外

神祇壇 在治北門外

先農壇 在治東門外並州藉田歲收穀九石五斗

明 櫛

厲壇 在治北門外州志

附周大烜正安州厲壇屋記社壇無屋傍佛廬民

居為承祭不蔽風雨珍州社在北郊里許傍鮮屋

椽祭遇雨多係攝行草率從事州正為山川鬼神

之主祈報不親何以迓神庥而康黎庶乙巳春社  
雨霽粗能行禮州從事蔣君告予社北有厲壇屋  
數椽以面牆弗容僕從且將傾若移社北則祭社  
祭厲俱堪稍憇遇雨可俟霽成禮一切移費存項  
若干可辦予謂善舉宜速卽爲浹旬祭厲爲防雨  
地蔣君卽日鳩工闋旬竣事遙望此山之麓忽新  
亭閣宛然點綴及祭厲陰雲將雨然可恃成禮者  
有斯屋也社與厲分一壇一屋有司春秋致敬爲  
數百里士民祈福暇日借賓佐舉酒斯亭不亦有  
白蘇遺意乎是爲記乾隆五十年

關聖廟 在城內南街乾隆二十一年知州謝之燧  
創建正殿三間兩廡六間後殿三間

附李彌高關帝廟碑正安古珍州也不常厥邑于  
今五遷自古鳳建治以來幾八十載城垣未葺公  
廡草就又安問其他乎官斯土者苟有興作之念  
而地瘠民貧每懷靡及丙子夏牧侯謝公來撫是  
邦見其屋市參差毫無關鎖宵小易于出入于是  
創建四門以嚴啟閉又以北關地脉既接文廟修  
之可以興文東關地形鄰于卑缺補之可以致富  
又建石橋以垂不朽此非惑于風水之說蓋欲以

富且貴者期州之士與民殫厥父母之心已耳今  
歲春以武廟舊在城隍廟後非惟地失其制而狹  
陋荒涼不容拜跪謀欲更修商之同官暨紳士耆  
老捐金而外並及州之士民與客商之好善樂施  
者命匠興工啟三月而廟成余嘗聞諸父老言此  
地建州之初戶不滿百荆棘碍道鹿豕爲穴今則  
生齒日繁文明漸起非

聖天子聲教四訖及賢侯牧之維持調護安能至是繼自  
今願都人士爭自琢磨風清俗美仰體富貴斯人  
之心則戴公之德而荷神之庥其福利寧有窮乎

余忝司鐸雖不工于文時因士民之請而直以其事之顛末勒之貞珉俾後之覽者知斯廟所由託始也乾隆二十二年

文昌廟 康熙初建于州城後山四十一年知州汪曾垣遷于北門外廟林場乾隆三十九年知州袁治遷于南門外右山凹五十二年知州羅才標復遷于書院嘉慶六年知州楊皋亮于文廟遺址建復建後殿祀先代

附周大烜正安州文昌閣碑記珍州地廣數百里童試近千人

國家文教誕敷之時正山陬多士觀光之會而校試州童殊少愜心刮目究其所以皆人自爲學家自爲師士少觀摩官少鼓舞也時學博蔣君王君及蔣州佐皆同心振作烜謂富而後教須當置義田義宅以爲建舍延師之資爰集紳公議擇其無損于私有益于公者得宅若干厯田若干畝場市若干租歲獲金若干兩爲師生廩餼之費已有章程州士人同心樂助建文昌正殿旁舍共數十間武曲閣一所旣祀文星且聯文會絃誦有所揖讓有儀秀者愈進文明樸者漸更謏陋其氣象迥不同焉

創造之興烜適有平溪之役未及落成善後事宜  
仔肩更重不能無望于後來然以官民同志文運  
天開出而與中州士人齒伯仲化苗移俗亦我輩  
承平時稍舒報效也是爲記乾隆五十一年

城隍廟 在城內南街武廟左乾隆十九年知州汪  
歙建

火神廟 在城隍廟後乾隆五十二年知州羅才標  
建

東嶽廟 在東門外創自前明原名永興庵

國朝康熙六十一年知州印聖臺改建門外有老桂二

株輪困盤鬱頗壯觀瞻

龍神祠 在先農壇後嘉慶十九年知州趙宜霖建  
有碑記

附龍神祠碑記國之大事維祀與農雨暘勿時官  
斯上者有祈禱之責焉正安有老龍洞距城東五  
十里高山壁立內蘊巨潭灑瀕源洑神龍窟宅祈  
求雨澤捷於影響龍之爲神昭昭矣先是龍神祠  
於州署之內春秋報賽民弗以爲便余籍隸南豐  
昔牧山右朔州嘉慶丙寅冬奉

旨揀發來黔已巳之秋補授茲土迄今已逾五載久思創建

專祠以崇祀典因皆擬銅鉛之役朝令夕行恐未能成厥功是以暫遷神位於先農壇側今秋採辦滇銅差竣回州又將量移安隆有志未逮非所以答神庥也迺集州之耆約度地興功咸稱農殿後山原平衍位正坎離維茲可以奠神宅緣思勾龍爲后土是龍神與農功有呼吸相通之義亟命庀材鳩工而興築焉建祠立宇周築垣墻購料估工需銀二百數十兩今余已先將需費墊發爾士民情願樂輸者登名於簿不足之數余當捐廉以成蓋非徒集腋成裘貞珉永泐亦以見報功崇德含

哺同懷余以因民而事神因神而建廟神以人靈祀以誠格今茲新廟既成將見神之權司霖雨者感而遂通也是爲記嘉慶十九年

禹士宮

在城內南街卽湖廣會館

萬壽宮

在城內東街卽江西會館

萬天宮

在城內西街卽四川會館

老龍祠

在城東五十里洞深淵也神物居之每歲

旱士民禱雨者以蠟封瓶口長竿縛置水中少頃激

蕩成聲水入瓶內雨隨瓶起甘雨沛施乾隆四十年

知州江獻琛修整神殿清查原業復建龍神祠于州

署內嘉慶五年知州素隆額刊碑于州署大門外十  
九年知州趙宜霖創新祠于先農壇之後並將老龍  
洞香燈田產基址銘勒于神祠鐘上

三撫老穆相公祠 唐乾符三年太原楊端應募赴  
播州平南詔賊退授武略將軍遂居播地有善政後  
播人立祠以祀稱爲三撫老穆相公附以嚴唐羅冉  
爲四官財神至今徧祀

蠶神祠 州人向不知蠶乾隆十三年吏目徐階平  
攜蠶種教以飼織至今資生衣被無窮州人立祠祀

之

並州志

桐梓縣

社稷壇

在城北一里孫志城西半里賈志

神祇壇

在城南一里許孫志城北半里賈志

先農壇

在治東門外雍正六年建卯志藉田歲收穀

四石九斗不敷銀赴司領櫛冊

厲壇

在城北孫志

關聖廟

在城外孫志在南門外蜀志雍正六年建補修

不一地志

地基乃明侯梁柱捐買冊并一在婁山關賈志

文昌宮

舊在北門外賈志乾隆中建于城南官渡河

右岸道光十八年重修規模較大于昔又元田垣夜

郎關鵬塘並有文昌閣

城隍廟 在治北明同知尹志伊知縣王桂建萬曆

四十年知縣萬建侯因廟制湫陋捐募重建志

國朝知縣賈國樞重修志

虎頭祠 在治西志

崇德廟 在城後虎峰山祀蜀太守李冰宋楊寶建

以後補修不一

普澤廟 在城南七里茹芝埧祀唐經略安撫趙延

之志

馬王廟 在縣署右道道光十八年重修

五顯廟 在城東南二里魁崖站乾隆末圯蹟

禹王宮 在北門內乾隆中建

炎帝廟 在北門內

雷祖廟 在南門外雷台山

萬壽宮 在南門外乾隆中建

萬天宮 一在水坦塘一在樹坎一在南溪一在廟

樹坦

總師廟 在峰崖原名龜鳳寺明崇禎七年建

國朝雍正七年重建

三官殿 在城南二里魁崖山上明末建

忠孝祠

在學宮左雍正八年建今圯地為民居

節義祠

在城東大街雍正八年建今圯地為民居

並印志

綏陽縣

社稷壇

在城南門外一里孫志舊置西郊二里雍正

十年奉文設立移至先農壇右縣志

神祇壇

在治南關孫志在西門外雍正十年奉文立

東西橫十三丈南北縱十二丈縣志按今在城西黑神

廟後周圍僅十一二丈攷舊址即今之黃土坎已成

田矣不知何時移此

先農壇 在東門外雍正五年建縣志籍田歲收穀四

石不敷銀三兩三錢二分赴司領冊

厲壇 在城北三里孫志在北門外清明中元二祭各

銀七錢下元銀六錢共二兩在地丁項下支給縣志

關帝廟 在東門內明萬曆四十年知縣馮士奇建

國朝乾隆二十四年知縣陳世盛查有誕民每年繳縣

山租銀十兩作春秋並五月十三日祭祀之費勒石

為記縣志一在城縣志四十里

附馮士奇新建武安王廟記王以漢室精忠生為

烈士死則明神磊落一時感激千古故凡窮鄉僻

壤無不廟祀非偶然也辛亥冬余奉命來令此土  
展謁廟祀曾未有所謂義勇武安王者不覺愀然  
興嘆久之夫綏之改土爲流凡十有餘年而祀典  
之缺已至此乎因出俸薪三十金役哨兵若干人  
募邑中之篤行好義若干金選材諏日鳩工興事  
經始於壬子之春落成於癸丑之秋其中正殿報  
亭前後重門各三楹左右廻廊各五楹至鐘鼓有  
樓結義有祠無不金碧輝煌庶可棲神而妥靈矣  
時王謨等以前所未有請勒石以誌不朽余按王  
夏關龍逢之裔孫也生當桓靈之末迨漢祚式微

強臣悖叛曹操虎視乎中原孫權雄據於江左先  
主雖帝室之胄以孤軍處二強寇間搖搖如風中  
絮謂其能討賊嗣漢誰其信之以故當時智謀勇  
略之士若或若攸若瑜肅紛紛然俛首臣妾於孫  
曹以赴功名之會疇復知有正統哉孤窮如先主  
疇肯相與以有成哉王獨義析麟經分昭逆順與  
燕人張翼德委贄先主慨然其誓以興復如雲風  
之從龍虎者左右禦侮艱險備嘗舉成敗利鈍有  
弗顧焉其所見者一於輔正故其所許者一於  
成仁也旣而降于禁戮龐德威令赫然震盪寰區

曹操謀徙許以避其鋒江東請求婚以結其好使  
西南半壁之蜀屹然鼎足庶幾吹炎灰於復燃此  
寧直爲萬人敵已哉迄於今二千餘年莫不崇廟  
貌陳俎豆卽庸人孺子皆能知王之姓名慕王之  
忠義其與狙孫鬼操汗名穢行遺臭萬年奚啻天  
壤哉余特記諸石碣非直爲今日計俾後之繼此  
邑者知今日之興修當爲後日之頽垣謀也觀其  
將頽卽嗣而葺焉庶幾斯廟永永無斁以克遵我  
朝表忠崇德之旨詎非有司之職守哉

文昌廟 在縣學右上下共六間大門一間知縣鄭

松齡建又鄭場亦有文昌閣並縣志

東嶽廟在城東孫志

八蜡祠在明洪武間建里人春秋祈報于此

通志今圯縣志

城隍廟在西門內康熙四十四年知縣秦梁重修

後層圯雍正八年知縣唐椿補建復創拜亭大門及

兩廂後築石岸以固基址

附馮士奇城隍廟記謹按祠典能禦大災則祀能

捍大患則祀城隍司釐保禦民災捍民患衍國祚

於靈長非淺鮮也方今神州赤縣綦布星列未有

守令而無城隍者守令理明城隍理幽理明者賞  
罰猶有未徧彼狡僞者猶得逃於法網理幽者彰  
瘳無微不燭卽狡僞亦無能逃其照鑒矣辛亥冬  
余蒞茲士展謁祠下顧瞻殿宇三楹幾於傾圯悵  
然久之第文廟尙未建立卽哨有兵山有木安能  
並舉厥工哉今幸文廟落成矣仍責千總郭行達  
董其事遊吏中勤謹好施如黎應舉者兼理焉經  
始於癸丑冬迄工於甲寅夏兩廊與山門業已告  
竣隨列十冥府於廊儼然相向以示神道設教之  
意丹青絢麗頗肅瞻仰乃偕僚屬諸君子虔祀後

進鄉耆兵民而告曰爾等亦知祀神之道乎夫城隍者非所謂聰明正直之神耶聰則靡不聞明則靡不見正者無邪直者無曲有如秉道持操好善樂業寧樸拙無獯狡寧甘貧無欺騙寧循理守義無飛誣捏詞則神將庇之福之而無不逢吉矣不然而姦盜公行而恐嚇局騙而巧口引誘起滅詞訟神且吐之弃之罰不爾貴又何祈禳之足云伊訓云作善降之百祥作不善降之百殃斯言豈欺我哉爾等其悚意而聽之

五顯廟

在治東有記

縣志知縣唐椿重建

附劉春暘重修五顯廟記五顯神號曰華光大帝  
謂五行之宣著莫甚於火故祠以五顯名凡言顯  
者神聖之哲號也夫火因時化育以成萬彙其神  
固甚昭昭炎帝配之至於三臣譽有祝融堯有閼  
伯相土皆爲火正或食於心或食於味由來尙矣  
茲乃五其像而被以後世之衣冠者何耶豈以大  
庭一帝及以火正三臣當之也抑以南垣朱鳥七  
臣主之耶然於五之數不合也嗚呼議禮紛紛緯  
書爭作南方之神其名爲赤熛怒唐之典禮併載  
其名是皆方士怪誕不經之說久不可戶說以正

論矣余維祠以五名卽周禮小宗兆五帝於四郊之外吾夫子以之語康子者也因時異地迎之於郊未嘗屋而祀之也自辛垣平以望氣蠱漢文帝作廟渭濱五帝同宇於是水火木金土之神不復兆於四郊或合祠於宮中或合薦於明堂而道家者流源委不辨誤謂回祿一帝厥有五人遂名以五顯而不別也夫合五顯於一宮固屬方士之矯誣然於五帝而專祠一火則未始不可以勵民俗而捍其災也子太叔曰火烈民望而畏之故鮮死焉畏則警理固然也若夫神之在上福善禍淫尤

爲不爽載在史冊炯若日星也豈可以聽其祠之  
圯而不一爲葺之也乎侯之捐俸以修之也可以  
起民之情而合乎祀典之正矣侯諱椿號東麓以  
中書留知縣事多惠政余樂其工有成也故誌之  
川主廟 在城外孫按在西門外三修結庵舊址廟  
後卽三修墓前有沙棠大數圍云其手植

陳子昂祠 在綏陽縣西其裔孫陳昭遠建

附劉仁臣祠堂記昭遠陳君潼川名士其先系出  
射洪以避仇居播萬厯庚子征播余從先大人轉  
餉播平落業與陳君居比鄰遂訂交焉陳君性任

俠好古文詞工五七言唐拾遺陳公白王乃其遠  
祖元興元年平章公其九世祖也辛亥秋陳公作  
家廟以專祀時余有北平之役閒居九載歸而陳  
君謝世矣其子真賚緘過請曰此先君遺命以致  
先生者啟函述其創修之意而屬余記其事其略  
曰拾遺公之在吾鄉者有老祠堂專祠拾遺公平  
章公配焉吾宗以喪亂多散處某不幸避地來綏  
三十年祠堂香火斬然久缺某恐旦暮填溝壑不  
獲上先人邱墓憾當何如耶聊構數椽以繼謝洪  
之祠焉余謂真曰子知之乎君子將營宮室先立

家廟於正寢之東昭孝思也拾遺在唐爲一代文  
宗工部詩曰有才繼騷雅哲匠不比肩公生楊馬  
後名與日月懸又曰終古立忠義感遇有遺編由  
是觀之其文其人拾遺千古如見若翁念祖而修  
厥德不隕厥祀此固無窮之孝思也子其曷哉余  
因之有慨矣年將就木故園之思刻刻不忘先塋  
在此難以舍去今觀仁人孝子之用心而余益滋  
愧矣子其時脩而薦享之以不負乃翁之意孝莫  
大焉真曰唯唯謹受教乃命厥弟虹以片石書小  
楷列諸壁間

里社壇 里人春秋祈報百家一會今圯縣志

土地祠 在縣署左縣志

祖師廟 在治北縣志按在城內

土主廟 在鄭場

總司廟 在縣志常住田在陽崖一在北六十里

萬壽宮 在城內江西人建

禹王廟 在城內湖廣人建並縣志

黑神廟 在城西嘉慶八年知縣劉賢業建

靈臺閣 在城南一里卽陳志雲臺寺久廢常住田

土寄入學中其地占綏邑形勝知縣張夢驥於道光

戊子重修改名靈臺祀文昌關帝卽以閣爲鄉學於  
舊寺焚獻之田租十石內撥出二石更斷入萬壽寺  
元音寺互控田土歲共得租十二市石以爲延師東  
脩閣別有曠地歲得房園租錢千餘以供修補之用

橋冊

武侯祠 陳志稱臥龍廟

柳公祠 在城西十里祀唐柳宗元明萬曆間知縣  
詹淑建  
通志知縣馮士奇重修有記譚按今圯地爲民

田

二冉祠 在城西祀冉璞冉璣  
通志知縣左懋穎建今

地縣志按地今為民居

母公祠 在城內祀明知縣母揚祖通志縣大門左今

地縣志按地今為民居

蕭公廟 係鄭場公館今廢為廟陳志

三府祠 在治北趙家里祈禱輒應獨志

詹公祠 在城隍廟側祀萬歷間初設知縣詹淑通志

在西門內後圯乾隆三十四年重建縣志按今圯地為

民居有像在城隍廟右側

附馮士奇詹公生祠記從來牧民者不難一時今

民悅而難去後令民思蓋歡悅一時者可以智籠

可以術愚若去後之思 有深仁厚澤漸涵於民  
心而民感激愛戴欲去而不能也詹公之治綏可  
思已公初在資陽仁心仁聞未暇枚舉資陽固已  
祠而祀之矣迨播逆受俘勅地設縣而治難其人  
各縣知公賢能舉於朝天子報可公銜命來綏關  
草萊撫流離築城郭建衙宇拮据焦勞不踰年而  
事多就理萃四方之黔黎授新墾之井田擒劫掠  
之巨寇折不決之疑獄遇孤寡則捐金授畝覩貧  
乏則推食解衣國之所在不知有家民之所在不  
知有身公洵南陽之召杜耶歷任五載名達神京

晉職本郡清戎兼理而擢守馬湖之命下矣然公去綏而德在綏也民不見公而見德也因重爲之構祠樹碑而徵余言余幸繼公後無論巨綱卽日用常行無不以公爲大要嘗讀公聖諭解勉期無媿於公而弗能也然則公之德政寧獨綏士民念之余亦穆然有遐思矣寧獨余思之不置將見後之繼令此土者有不恍然思憬然慕者乎蓋其深仁厚澤貽謀善而人人深故能有此豈智籠術愚歡悅一時者所可同日語哉唐椿重建詹公祠記

萬厯中公以廉幹蒞茲土時蠻獍甫淨人烟渺寞

公芟荆刈莽而城郭之經舍宇分畛域生聚喫咻  
戛然成治晉太倉守綏民遮畱塞轅乃得同知本  
郡未幾底績擢守馬湖悲思者繹於路至今邑民  
呼阿翁不已矣先是公旣去民不能忘立祠尸祝  
而寓其像於城隍左側余承乏於此循公規矚幸  
免覆餗因思公爲綏民奠厥居而後之人曾不能  
爲公具椁棟咎將誰道敬捐薄俸治室居像而設  
田以報蒸嘗祀典曰有功德於民者則祀之公奮  
乎百世以上傳聞者莫不興起其功與德著於口  
碑後之令此土者嗣而葺之則公之教思常存矜

而式之則公之流風俱遠勒石以記其事景慕前  
人亦所以畱贈後人云爾陳世盛添設祀典記前  
人之立功立德豈必有崇報之思盡其道焉而已  
後人之以祀以享未嘗緣推奉之轍重其賢焉而  
已自前明萬曆庚子平播設縣以迄於今蒞官多  
矣惟昔蒞之詹公崇其祠舊而復新畱其像久而  
如昨良以公當建置之初其功德膾炙人口鏤入  
人心盍見於全志中爲有目共欽者不待稱贊盛  
攝綏之三日詣公祠覩公像瞻拜之下殊覺曠世  
相感慨然想見其爲人特是前任唐公脩新祠表

額並買田一坵價銀十兩付城隍廟僧耕種以爲  
每月香燈之費而春秋二祭實無以薦馨香是亦  
望容懸臬之貽譏矣踵其後者寧以苦於無措致  
謝不敏乎查永興場每年有納官地租銀二兩四  
錢亦可修祀典以供牲醴猥云菲薄亦策善之一  
端自乾隆二十四年起以此項充其用在公生而  
爲英沒必爲靈民奉於令而不辭輸將令納諸有  
德有功之前令以彰宗報雖非公之所思諒亦非  
公之所棄矣有同志者踵而行之庶永垂之不  
朽云

李神童廟 在城東楊進村知縣朱由挺建有記縣志

白氏廟 在金子垣祀唐蒲州刺史白居易按非

祀香山乃其子孫移居綏陽時所建香火堂也即今

金山寺

仁懷縣

社稷壇 在治南門外

神祇壇 在治門外

先農壇 在城外東北藉田每歲收穀三石八斗不

敷銀三兩二錢三分三釐赴司領

厲壇 在治北門外

關帝廟 在城內

文昌廟 在城內 文廟左

城隍廟

江神廟

禹王廟 在城內

萬壽宮 在城內

三聖宮 在城西三十里茅台村

忠勇祠 在城北三百里竹瓦寨威遠衛指揮僉事

袁墨陣亡于此因建祠祀之

寺觀 附

遵義縣

萬壽寺

在龍山上宋嘉定初建明洪武末重修明

志即龍山寺

蜀志通按今稱小龍山寺

玄妙觀

在宣慰司治東宋嘉定間建明洪武中重

修明統

按即今桃源山之觀音堂

集貞觀

在宣慰司治西元至正間建明洪武末重

修明統

真武觀

在治東五里陳志

淨土庵

在治北文昌宮上陳志按在城北十五里崇

禎四年重建康熙二十七年再建又名營盤寺

海朝寺 在海龍望明平播後兵備道傳光宅建蜀志

大士閣 府治前燭明萬曆四十年知府孫敏政建

通志按順治十七年兵備道賈彪撤府學左之金剛堂

因移材重修今四天王像卽自堂中移來者時有程

生雲撰記已漫漶康熙二十七年副將魏相重修以

爲地方官朝拜之所因名祝釐寺又名萬壽其何年

改祝釐無考今存蘇霖泓大士殿楹榜有帝以無爲

朝萬國句款係雍正癸丑知稱祝釐在雍正以前

佛光寺 在府城內初有銅佛像在荒莽中人往觀

輒風雷不可近後有異僧命居人齋戒往迎置此寺

志通

雷音寺 在府城南五十里陳志六水中突起一山

其下有飛雲庵通志前有雷水堰堰臨大山陳志按寺在

九龍山下萬曆四十二年僧宗蓮即楊輝墓祠基址

建

西坪寺 在城南百里又名虎邱寺僧大冶道場

附陳起相西坪寺記歛崎崩劣梵宇託焉在湘不

以為奇不奇飛舞奇坦曠蓋湘原少而峰多則以

少受選焉宜爾有地曰西坪飛舞夾縱坦曠中鋪

不此之奇是選雷之目矣坪又以石爲筋脊石自  
某地迄於板閣凡五十里狀若蛟虬蜿蜒而迤邐  
隱隱隆隆蛛絲馬迹之筍軸畫藝玲瓏受拜南  
宮非袍笏不敢見當坪之腹始張甚爲象爲獅爲  
龍爲虎然不示人以玩且韜藏之歟其人卓錫不  
偶也歲乙酉秋冶公和尚以蜀亂率眾適至響錫  
搖空笠篷正銳初非有取乎此會坪有四眾振師  
之名請輟沙灘之祇爲創結茆之憇師猶不以爲  
緣唯唯否否宿宿信信庸知山靈蘊結鬼神呵禁  
不爲化城不肯師遂一住十有四年茆就壞四眾

不聽師去乃開土創刹其峯乃有獅若象若龍虎  
奔走騰沓而來處刹之四隅不散去眾始大駭異  
之乃知師遊戲神通示人不測若此

鵲門寺 在治東七十里山周四五里其西喬林崇  
壁樂安江經其下回潭一碧環山而東明萬厯初黎  
朝邦父子始創伽藍於上名沙灘寺明亡朝邦子黃  
岡知孫懷智落髮住此名龍興禪院順治丁亥僧丈  
雪避亂來居旋去丁丑冬再至遂開道場易名禹門  
寺廣建禪居上下蜂房各開戶牖禪和諸子日至十  
百北建藏經樓貯四部釋藏後丈雪歸四川昭覺寺

其徒一莽繼傳棒喝丈雪有禹門六景石頭山鎮江  
 橋溪聲牧笛沙汀月浦六詩今寺中釋藏如舊故遺  
 聯福多破山丈雪手筆趙州中峰破山丈雪一莽福  
 圓各詩文語錄板並存貯

附丈雪開堂記略沙灘溪廻九折峰抱千頭神宗  
 初黎靜軒裁為伽藍龜鑑丁亥上巳余避世於茲  
 觀溪烟掣浪鱗藻躍風疊旃厥業未殫衷期越已  
 丑冬再尋溪口易龍興為禹門兵野戍勝境堪  
 誇樹為學業禪堂總以一鐺共煮眾姓施腴蔬圃  
 周備收跋涉遐邇之役免从坐新參之勞云梁應

奇撰禹門寺記稽昔禹師治水導河積石至於龍  
門華陰砥柱之墟皆獲安瀾懷山襄陵之勢不復  
如初萬世而下稱禹績受禹成者至今不朽不謂  
桑門亦有懷襄而本來面目載胥沉溺非有慧解  
人具救生心烏能手援諸溺而登之岍稽樂里有  
寺名沙灘者紺殿軒昂堂奧鴻厰石磴層嶙林木  
蓊蔚湖所創者肇自策眉始惜沙灘梵刹灘則不  
能遽濟沙又恒河難更恭請丈雪人天師範爲叢  
林住持於是易爲禹門禪院遏人心之江河濬羣  
胸之閉鬱使之洞見本來面目豁然通憬然悟有

如禹之隨山決排機忘物我真利濟之人乎師蜀  
之內江人棒喝交參印德山濟北家言實傳曹溪  
正脉說語錄凡若干篇平澹自如行業兼備將與  
禹功並垂不朽余因視師三川便道遊覽盤桓嘯  
傲識師景真敬作記言以紀盛心云

純陽閣 在治北五里按閣當會川河水會孤阜挺  
出秀臨綠潭古木幽蘿掩映水石順治庚寅忠國公  
王祥建閣於上像祀呂祖乾隆四十二年知府蘇霖  
泓補修有邑舉人唐惟克記閣側有一石爲憨憨道  
人棲卧遺跡遊憩者一枕一琴幾忘塵境霖泓詩云

純陽閣上好煙霞擬放銀河八月槎鐵笛一聲來道  
侶桃花幾樹著人家

西來寺 在治西三十里八里水平林荔鬱一徑通  
幽康熙初本楊氏宅地總兵吳之茂以爭構勸捨爲  
寺僧兩生遂於此開道場名松邱禪院手披大乘經  
字數種柏數十萬株其尾字倒植之後長枝皆下垂  
今猶存內釋藏爲僧明澄走京師請於當事康熙五  
十六年丁酉 十四王供施裝造奉

旨齋來永鎮山門者共六百七十六函通六千九百五十卷  
後知府趙光榮募製經匱存貯

附高翮映松邱緣起薪盡火傳法燈慧焰於以續  
佛靈根惟一大事因緣無有餘二然則因根起緣  
因緣相觸而生妄境塵刹瓦礫大地河山無非法  
身邊事蓋逐事則離根心則會會極則語語而不  
作聖澄聖解乃可頓入性海故說有礙塵設空著  
妄一立語言皆無是處以之平等性得大空心乃  
如如自在在地耳一日余因公來播結宰官因緣竟  
而後比丘長者居士以至性善男子皆以因緣結  
我有頃兩生禪師亦隨緣而至啟門納客措之坐  
以眼代口傾蓋間不立對待塵不生知見解水乳

之合其亦石上相逢得非兩生契濶而能然耶嗣  
一日禪師復來晤出所爲論疏以示相與降澍天  
花而針投黍透抑語默動靜無非爲一時因緣事  
歟微言之緒偶及禪師所創松邱禪院乞余爲序  
其緣起乃曰初此地名八里水風景頗異寺址乃  
楊氏宅基因兩姓鬥訟僧賴吳大將軍得遂支公  
癖焉余曰金剛至堅也擊之以羚羊角則迎手而  
碎禪師無煩惱能破除人之煩惱得佳清涼界以  
大將軍爲之金湯理固然矣問八里水之名何居  
禪師曰離寺三里許有洞焉水從洞出流八里人

別洞中是以得名寺之左壑曰牛郎塢右峰曰臯陶山後十里遠近有臯陰灌木則名九蒼林其所由來莫可狀詰余曰無名其謂之古始有名乃以物母借問立松幾株牛郎在壑而織女安適臯土師日刑幾人九蒼溟溟十里何限禪師曰唯萬象空花了無是事松且不有況於他乎余因誦瓦屋山木皮因緣旣乃徐爲禪師釋曰所謂山河本於清靜固其然也而其機起於忽生今日禪師與浴雲子舌妙機圓忽生影事不可謂之無是皆虛妄卽禪師建立寶王亦應與空花兔角等不可謂之

有如是則織錦水於機上開劍門於匣中未爲不可也  
以心緣法塵獨影境現余知松邱之幽壑冲深高霞翼嶺石磴逶迤幽廻九折而歷睇湘川諸山幾爲之劣焉  
臥遊自醉他日不必費資糧更遊第二道場矣持此卽作松邱緣起  
名山有靈當永爲呵護廬陵高翫映成文生於遊成遊而後知文之非其景也  
文託心生心隨文幻夫虛虛實實言亦旦暮遇之而已曾聞之去此十四國土有世界名旃穆多香彼國人以夢爲真以實爲妄其餘飲食衣具皆從一夢而後飽煖始自得焉不夢則不

真以爲有余昔也疑今而乃悟謂今日之遊虛前  
日之文實話因閣上當與上人話之浴雲居士高  
喬映誌羅兆牲代陳瑄撰補修禪院記學士大夫  
宦轍所居必有勝刹通流與爲棲息往來非第縱  
逸遊賞方外也所以滌塵翳發錮覆其益宏矣在  
昔如裴休陸大夫蘇黃諸人固以是爲歸而欲燒  
佛骨之韓子亦不能不心醉大顛蓋佛骨自可燒  
大顛自可參原不相礙此所以爲退之也而駭儒  
且盛氣辨之謂爲無有不大可哂耶子吏遵三年  
遵固陋遠求所爲金碧焜煌壯觀一邑者旣不可

得卽疏林卷石布置略佳亦絕未見至城剎繙流  
率諷唄取直香火衣食耳無可言語者禪宿藏天  
故兩生老人之高足也住錫城西松邱禪院惠然  
來訪予延見之淵儀玉韻英英照人因樂與周旋  
一日持綠蘿高雪君所撰松邱緣起相示予快讀  
一過恍坐話因閣而左顧神媧右揖庭堅也始歎  
桃花源去武陵數十里耳劉太守不親往搜尋豈  
復有津可問若茲邱則距城更近予且薨薨至今  
未前不令拂雲諸叟遠笑俗吏難醫哉藏天白曰  
高公鐫記後寺中補造者有大都督鄭公及裨帥

等合樹之坊有傳李二太守莊嚴之佛有諸善信  
捐建之天王殿五齋堂一十有二落成於今戊辰  
濫觴於壬戌公不吝如椽踵高公而記之爲茲寺  
增一勝事可乎予笑曰雪君先成文而後遊謂文  
爲實而遊爲虛其言甚辨然旣文之矣何非遊者  
文實則遊亦實遊虛則文亦虛虛實倘分真妄互  
起不幾夢中說夢覺外尋覺耶予再蹈斯例是饒  
鄭人之鹿蹤臧氏之羊也藏天曰蔡少霞伏枕書  
碑所謂山元廓者當以何人實之某未敢望顛公  
尙幸退之不來可免五百年後人饒舌耳余謝曰

子之善辨也予行且至矣因書其語爲記其施賢諸人例得備書於後至本寺始卒已詳雪君記中雪君記佳可畱與後人也

茅衙寺 在城北十五里茅坪原名仙巖莊初爲楊應龍妻田惜玉所居稱曰茅衙平播後李氏得之改建爲寺通志

黃鐘寺 在城北四十里四境皆田中聳一石如螺明弘治間夜大風雨光怪閃爍居人旦往視之有鐘懸樹間因建寺居之後圯

國朝順治十八年里人張時有增修通志

天臺寺 在城北四十里僧煇一建巖洞皆奇通

玉皇觀 在城內舊有文昌乩筆記

國朝康熙五十八年知府趙光榮重修通按觀宋建元

明間屢修舊記載金石

先天觀 在城北三十里紫霞山明正德初楊顛仙

建今改名紫霞寺通有碑記陳文載金石

祖師觀 在東門內又東二十里亦有祖師神祠陳

觀音閣 在東門內陳又城南百里天六甲有觀音

寺創自前明以後屢經補修

三官殿 在東門外

大悲閣 在東門外

太平寺 在治東獅子橋

東林寺 在治東二里

普慧寺 在治東五里並陳志

湘山寺 在治東二里陳志按明統志云湘山上有大

德護國寺即此

六寶寺 在治東二十里

白蓮寺 在治東十里

砂岡寺 在治西四十里即白牛寺

石寶寺 在治東四十里並陳志

廻龍寺 在治南鎖水陳志按一在城南九十里

延禧寺 在桃溪

常山寺 在治南五十里

福源寺 在治西二十里並陳志按寺唐宋間建

文帝曾寄宿題詩

永定庵 在治西一里

海月庵 在治西二十里並陳志

甕海寺 在治西五十里陳志按又名廻龍寺

白雲庵 在北門外陳志按城南六十里有白雲寺

萬曆中建

普賢庵 在治北二里

高橋寺 在治北三里

大覺寺 在治北十里資中閔相建

活龍寺 在治北十里並陳志

慈雲庵 在治北二十里陳志按吳逆時楊維柱捐業

建嘉慶十四年僧重建庵中有銅佛三遷自海龍聖

董公寺 在治北十五里陳志按舊名龍山寺後名西

樂庵康熙元年兵備道董顯忠重葺有邑舉人王以

中記乾隆六年有燕僧來重修易名董公寺

天馬寺 在治北二十五里

廣佛寺 在治北三十里

天成寺 在治北二十五里

上龍洞寺 在治北四十里又有下龍洞寺

天臺閣 在治北四十里有奇洞

臨江閣 在治北四十里舊名太元

曲水禪院 在治北四十里

石華庵 在治北四十里

黃琮巖寺 在治北四十里

五岔寺 在治北六十里並陳志

朝陽庵 在城東百里康熙四年羅某與妻姜舍宅

建身為僧尼有碑記其事

黃池寺 在城東九十里明萬曆中僧性穿建

龍聚山寺 與黃池寺近明萬曆中建一名永靈廟

白衣庵 在城東九十里

官城廟 在城東九十里初三撫相公舊城今廢為

廟土人湯餅日祭之謂能保產厄外有鬥牛城鬥雞

城迎春臺上馬臺金刀坑古跡

古令寺 在城東四十里昔有異僧禪一焚化於此

金瑞山寺 在城東六十里舊名青岡山又名麒麟

寺為川主顯靈處相傳昔有川主像並銅鐘飛至此

鐘有銘載金石

大寺 在城東南七十里傍有塘高廣數丈四時不

涸側有石隙春夏水溢卽自此消

華嚴庵 在城南五十里飛鳳山下萬曆四十七年

僧元定建

高勝寺 在城南五十里龜伏山下明萬曆中建

龍華寺 在城南五十里又名馬家寺

坐雲寺 在城南六十里獅子山卽常山之首原名

蟠龍閣順治初建康熙三年有侍講長壽王長德記

二十八年改今名有知縣陳瑄記

方廣寺 在城南六十里天台山卽常山之尾舊有

小庵祀土地神萬曆中改

雲臺寺 在城南八十里崇禎十四年建

楞嚴寺 在城南九十里又名石板寺

延齡寺 在城南九十里祈壽山

雙山寺 在城南九十里

朝陽寺 在城南百里鳳凰山下萬曆間建又南一

甲茶欄頭亦有朝陽寺康熙間建

報恩寺 在城南百里臥龍山下又名馬坪茶腰寺

雙林寺 在城南六十里又名水口寺

金山寺 在清潭里宋咸淳間建明羅其賓羅承恩

重建相近有金堂廟

復興寺 在城南五十里仙鳳山明正德間建又名

瓦廠寺

雙溪山寺 在城南五十里龍坪又名水口寺萬歷

中建相近有後衙寺

靑龍山寺 在城南七十里

龍寶寺 在城南百里龍鎮山

仙人山寺 在城南百里又名水口寺

護國寺 在城南九十里又名磨坦寺順治初建

瞿曇寺 在城南百里明萬曆中建中有石谷和尚

語錄板

大興寺 在城南百里創自前明

桃溪寺 在城西十里

玉台山寺 在城南八十里創自前明

堂臺寺 在城南九十里明御史陳啟相落髮於此

所建

天池寺 在城西二十五里紫金崆峒二山間下臨

大水堰順治中建

金麟院 在城西五十里三層崖上順治中建康熙

間移建山頂嘉慶二十五年寺僧通梅募鑄銅鐘重千餘斤圍丈八尺聲聞數十里

水月庵 在城西南四十里九峰山下明萬曆三年

建又名水口寺

落埜寺 在城西六十里金鳳山順治中建

恆澤院 在城西五十里又名陳堂寺明崇禎十六

年陳應麟建經樓貯萬歷間施寺藏經

萬福寺 在城西南八十里雲霞山創自明萬曆中

原有九殿後以兵渡烏江折作浮橋僅存川主一殿

乾隆四十九年遷建奉佛

慈音寺 在城西南八十里又名阿陀寺又名水雲

堂明萬曆二年建

棲和寺 在城西百里六寶山溫泉上明未建

廣惠寺 在城西九十里永定山上又名堰村寺

花茂寺 在城西七十里金鳳山明未建

佛興寺 在城西七十里會龍山創自明萬曆時

鐘峰寺 在城西南百里明崇禎中重建

雲水寺 在城西百里

東流寺 在城西百二十里

興隆寺 在城西八十里三奇山下有青龍寺

古柏寺 在城西二十五里又名張家寺

東山寺 在城北二十里

迎水寺 在城西北二十里

金藏寺 在城西北四十里

靈應寺 在城北二十里創自前明

馬鞍寺 在城北二十里

水源寺 在城北七十里

紅廟 在城北二十五里

雲龍庵 在城北八十五里永安山又名中寺距三

里許有永豐庵又名上寺並明萬曆中建

正安州

寶覺寺 在城西七十里古刹也翻明萬曆九年僧

錫牌增修俗名錫牌寺通志

冲虛觀 在真州長官司治北元建明重修明統志

本剛寺 在城南五十里茶坪州志康熙七年知州高

理重建通志理理蜀志作理

蟠溪寺 在城北百里州志明萬曆初僧孤舟面壁於

此通志又名蟠龍相傳嘉靖時楊升菴到此題詩壁上

寺前沙磧光燦如金撥之以杖則黑所云金沙鋪地

是也州志

龍塘寺 見蜀志在州南八十里林溪每年收寺中

租穀四十石為鳴鳳書院掌教薪水

德星寺 在思六甲

玉皇觀 在州南七十里並州志

普明寺 在治東陳思二甲明統志在真州長官

司治東元延祐間建

真武祠 在舊城南門內有角井鱗魚舊址去治東

百二十五里思一甲

慈化寺 在城東百八十里思十甲明弘治十三年

修嘉靖十四年眉山蘇宗式探花平篳子坪賊石老

圖後重修古名雷興寺

觀音寺 在偏崖一在思十甲一在德八甲一在小

二甲

廻龍寺 在城東百里思十甲一在德十甲

蓮池寺 在城東思四甲一在城南德九甲

朝陽寺 在偏崖一在德六甲

報真寺 在城東思七甲明嘉靖二十年真州鄒養

官建

法堂寺 在偏崖

蓮華寺 在德八甲

普陀庵 在小六甲

觀音閣 在南門外石笋峰康熙初有大土相止于

峰巔居人因建閣焉後復于峰腰建鐘亭正殿

南京堂 在思三甲

龍池庵 在思三甲

鳳凰寺 在思三甲一在北二十里小米莊一在江

九甲

崇興寺 在思五甲

銀瓦寺 在思五甲

永興寺 在偏崖

寶鼎寺 在偏巖

高峰寺 在偏巖又名天峰

雲臺寺 在思十甲

華光寺 在城南八十里德一甲雙子頭

海會寺 在德一甲

吉祥寺 在德一甲

興復寺 在州南九十里又名水口寺康熙四十年

知州汪曾垣置有常業一在江十甲

馮村寺 俱在州南德二甲

善緣寺 在德二甲北宋大觀五年建

水盤寺 在州西二十里德二甲

華嚴閣 在州城西門外一里又名三奇寺明聖羅

閩真州鄭長官建

水叢廟 在城西德三甲

楊泗殿 在城南十里一在德五甲

水口寺 在城南四十里德六甲杉木坪

大成寺 在城北五十里唐乾符間南詔陷播州築

城于此城垣基址尚存南川有瑪瑙城羅尾城一時

同建又云此城乃南宋寶祐年建

洗腳寺 在城北五十里又名下寺

大寺 在城西四十里水車德七甲

小寺 在城西四十里水車德七甲

高岑寺 在城北三十里水車

寶全寺 在城北三十里董家垵

梓潼寺 在城北三十五里九龍山下一在小五甲

風子寺 在城西四十里小水巷

復興寺 在城南德九甲

廣積寺 在德十甲

蒲村寺 在江一甲又名簸箕寺

秋山寺 在江一甲

三教寺 在江二甲

藍龍硿 在城西七十里黎地古名藍蛇硿

千古寺 在城西北九十里江四甲羊坎

三界寺 在州北三百里又名鼎箐寺桐梓南川正

安三處交界山形如甕晴天常霧相傳明萬厯間總  
兵劉綎題詩寺中

張村寺 在州北六十里江四甲

土皇寺 在州北九十里羊坎

雙修寺 在州西百一十里廟堂又名兩老寺

朝斗寺 在江六甲

金子寺 在州北八十里蓮子埧有金砂石

虎練寺 在江九甲

北京塘寺 在城西二十五里江二甲

魁首寺 在江九甲

乾溪寺 在江十甲

茶園寺 在江十甲張眼埧

慈意寺 在小一甲

龍華寺 在州北小二甲

新寺 在小二甲

報國寺 在州北九十里小三甲鐵窰

天河寺

萬善寺

明建寺

大興寺

魚江寺

川主廟

修

碗水寺

千齡庵

俱在小四甲

在小五甲

在州北二百里小七甲三公水

在州北南筭嘉慶十四年知州

董澈重

俱在小九甲

並州志

按陳志載有元妙金龍何村聖水大蓮福慶柏陽

平閔溪山爵梅子高洞金龜魚梁明興白雲  
寺今俱不詳所在

桐梓縣

甘露寺 在三坡砌石為徑高絕行人每苦渴

國朝順治間副將陳福平寇至此見單士覓水弗得為

之惻然因建寺一所斫木為槽引水巡撫張德地因

以甘露名寺通志蜀志同康熙七年學政孫允恭有碑蹟

嘉慶中重修

龍罩寺 在城西五十里雄視山頂勢極巍巍通志在

蘆溪里陳志按一名大佛寺明嘉靖中建

蓮池寺 在城西七十里平原中攢列數峰形如蓮

瓣故名通志萬曆十一年建有碑續志

三座寺 在城北三十里聳岫危巒水環若帶又名

三教寺通志

龍華寺 在治東續志按今在東門內

朝陽寺 在城西九十里寺建洞側魏峩幽邃續志

觀音寺 在治南五里賈志又北七十里有

觀音閣古刹也乾隆四十年重修有貢生令狐之激

碑記又北四百里亦有觀音寺明正德中建牛渡灘

亦有觀音寺

一佛寺 在城西十里中木椽續

二佛寺 在牛渡灘續

清泉寺 在治百里外續按邱志已無今無考

天池寺 在城西二十里天字峰下水一泓四季不

涸

羅坎寺 在城西南十五里又名興佛寺並賈志

祖師觀 在小箐續在城北四十里萬曆三十八年

知府孫敏政建有碑讚存廟中後過兵元帝顯靈於

此知府趙光榮總兵魏相都司杜進梅重修乾隆十

三年地六十年重修續

明月寺 卽鳳朝寺在城東北四百里明正德元年  
建

國朝康熙中寺經兵火乾隆十二年補修以後補修不

韓家寺 在治北二百里梵宇宏敞相傳山是靈鳳  
不敢鳴鐘

西來寺 在城西九十里並買

玉皇觀 在治南門外並

臥龍山寺 在城南四十里太平場明未建舊在山  
巔

國朝康熙間移建今地

離垢庵 在城西南牛渡河一名永興庵明萬曆時  
建後遭兵火重建

車子山廟 在城南四十里任壇墳

岡尾廟 在城南四十里後坎溝

九顯山寺 在城南四十里一名店子寺明未建

淨天廟 在城南三十五里鳳凰山

水口寺 在城南三十五里

金鳳山寺 在城南三十里明景定間建

國朝康熙丙子後屢經修拓規模宏濶左右有蓮池清

幽軒爽為諸廟冠

金鏡山寺 在城南三十里洞子河寺內有唐貞觀

中磬

七寶山寺 在城南三十里小水田新建

五福宮 在城南十里水坎嘉慶中建

夜郎寺 在城北七十里明萬曆中建

顯靈廟 在城北八十里夜郎墳有碑又北二百四

十里亦有顯靈廟乾隆中建

金龍觀 在夜郎墳山起平地寺在山腰

鳳凰閣 在城北七十里夜郎墳寺前有古墓內有

明人石刻

龍臺寺 在城北二十五里楚米坡

重興寺 在城北百六十里

沙坎寺 在城北百六十里水坦

柴山寺 在城北三百里黃坪村明萬曆十年建

寶藏寺 在城南八十里明嘉靖中建

麒麟寺 在城北四百里雙鳳山

龍居寺 在城北四百里蓋石洞明成化中建

高峰廟 在城北四百里大石板宋淳熙中建

銅鼓園廟 在城北五十里一名古蹟山乾隆中建

陳國公廟 在城南二十里陳頭營

心田寺 在城北四百里寶峰山

白雲寺 在城北四百里漢水漕寺居山頂明萬曆

三十六年建

黃沙觀 在城北百二十里原名金龍嘉靖前建

國朝乾隆中重修有令狐之激碑記

鼎山寺 在城南十五里卽鼎山縣舊址宋寶祐中

建後改建山下補修不一

白水廟 在治南十里

白鶴寺 在西門外

石笋寺 在治北六十里縣志

雲霄洞寺 陳志載按當卽碧霄洞然今洞外無寺

五龍寺 一在鄭家場楊氏所建縣志一在桑木關陳志

海月寺 一名嘉瑞陳志按知縣唐椿重建

中臺寺 在治北七十里縣志陽崖陳志按明嘉靖中建

蚌水寺 在治西北三十五里縣志

保子寺 在旺草陳志

萬壽寺 在城內

乾溪寺 在治東四十里

圓音寺 在治東三里

椒溪寺 在治東三十里

六和寺 在治東十五里

陳村寺 在治東十里

三句庵 在桑木關

迎水寺 在治東百里

大悲閣 在治西五里並縣志

金山寺 在治西十五里縣志按即白氏廟

慧光寺 在治西十三里縣志

青雲寺 在城西十里西山縣志按即休休結茅地寺

名亦休休所榜寺下有休師塔

石牛寺 在治西二十里

赤霞寺 在治西十五里風坎山縣志按卽陳志風坎

寺梁從繩赤霞寺碑略云寺在城西二十餘里地名

大風坎烏道千尋曲盤而上四面皆山中厰一坪明

永歷九年有和尚齋峰者開基建寺於此又徹字和

尙次大峰坎赤霞寺詩小峰不可及故曰大峰坎數

里入雲深路似九折坂孤閣影崔嵬丹崖氣清遠雲

際一聲鐘林木蒼蒼晚

九龍庵 在治西二十五里

長安寺 在治西二十六里

曲水庵

在治西十二里

並縣志

五涯寺

在治南十里

縣志

按寺舊刹僧月堃棲此重

修有萬曆三十八年知縣任昌期撰碑記月堃亦有

記

附重修五涯寺碑記縣治之南去城十里許有五

涯寺者乃禪林古刹也甲戌夏余蒞斯邑即聞有

楚僧月堃上人雲棲於此亦未暇一領也乙亥春

適以民事出道經五涯寺遂稅駕而訪焉詢其禪

脉來源則曰自曹溪六祖以下出破山老人傳佛

心印於錦江昭覺也詢其營築根由則曰自前庚

子平播之後時有麻城詹邑侯開拓縣署遂領文  
田土而建設也案頭有語錄數卷閱之皆釋家傳  
受心法藉此而磨礪羣徒且耕且讀食無求於世  
眠雲臥雪非無掛礙中人乎繼觀殿宇整齊爰追  
往事皆云前已傾頽自上人來山捐衣鉢貲仗檀  
那力厯五寒暑而告成知綏陽縣事任昌期羽詵  
氏撰儒學訓導丁世泰篆額典史張俊立石古懷  
白黃鼎書戒弟子真定寄名弟子任常慶萬厯三  
十八年庚戌八月初三暨碑

臥龍山寺 在鄭場臥龍山

獅子山寺 在鄭場獅子山

大保寺 在治北二十五里

宗峰寺 在治北四十里按原名明月僧五空建

隆興寺 在治西北九十里並縣志

合口寺 在旺里

朝陽寺 在旺里金華山先在山半一日佛前旛幢

忽起盤旋良久下立山下鄉人異之因遷寺於幢立

處更名爲插旗寺

古佛寺 在黃村塢三撫廟右乾隆六十年知府蘇

霖泓知縣唐椿重建

按陳志載有往水板橋金竹長壽水車白台延壽  
白雲寶蓋晏溪崖後高山瀼水嘉會十四寺今俱  
未詳所在

仁懷縣

西禪寺

在二郎里

通志

佛會寺

在小溪里

常樂庵

在赤水

並陳志

寶峰寺

在生界向爲縣行署

白馬寺

在生界距城二十里

營盤寺

距城三十里舊在鹿鳴山僧雲白住持其

中雲白死遂遭火其神像忽飛出因於其地建寺

明光寺 在李博里距城三十里初名明廣知府趙

遵律更

顯化寺 在赤四甲

正覺寺

花果寺

混元宮

月望山寺 並在赤四甲月望寺之雄富為仁懷諸

山冠

太平寺 在三塊石陳志按在赤九甲

寶靈觀 在赤七甲

羅漢寺 在赤十甲

寶蓋寺 在吼灘里

永興寺 在風溪口陳志

來鳳寺

永安寺

玉屏寺 並在安羅里

崇因寺

廻龍寺

三會寺 並在二郎里

飛龍寺

仙洞寺

團山寺

並在丁山里

五龍寺

佛會寺

並在小溪里

長岡寺

爛泥寺

普照寺

萬福寺

白果寺

並在李博里

遵義府志卷八

遵義府志

卷八

寺觀

三六